

- [Службы пятой седмицы по Пасхе](#)
 - [Воскресенье \(Неделя пятая\)](#)
 - [В Неделю самаряныни вечера,](#)
 - [Понедельник](#)
 - [В понедельник на Утрени,](#)
 - [В понедельник вечера,](#)
 - [Вторник](#)
 - [Во вторник на Утрени.](#)
 - [Во вторник вечера,](#)
 - [Среда](#)
 - [В Утрени,](#)
 - [В среду вечера,](#)
 - [Четверг](#)
 - [В четверток на Утрени,](#)
 - [В четверток вечера,](#)
 - [Пятница](#)
 - [В пяток на Утрени,](#)
 - [В пяток вечера,](#)
 - [Суббота](#)
 - [В субботу на Утрени,](#)

Введение

См. также службы: [Пасхи](#), [Светлой](#), [2-й](#), [3-й](#), [4-й](#), [6-й](#), [7-й](#), [8-й](#) седмиц
Содержание

Службы пятой седмицы по Пасхе

Воскресенье (Неделя пятая)

В Неделю самаряныни вечера,

на Господи возвах: поставим стихов 6. И поем стихиры преполовению, 3. Глас 5.

Подобен: Радуйся постником:

Явился светоявленное и красное Спасова Воскресния днесь преполовение всесвятое, яко полудне светлое, уясняющее мир Божественными благодатьми Христова востания, осияющее чудеса нетления, облиставает знамения, и показует на высоту Вознесение, являет многорачительное Духа пришествие, Пятидесятницы всечестных светлейшее торжество. Темже и подаёт душам нашим мир, и велию милость.

Яко Божественная славы река, празднику ныне преполовившуся, Господь струй благоутробия всем подавая, вопиет: жаждай да грядет ко Мне, и пьет тепле. Источник бо сострадания, и милости пучина сам Сый, источает миру оставление, омывает прегрешения, и очищает недуги: спасает Воскресение Его празднующих, покрывает любовью почитающих еже со славою Вознесение Его, и подаёт душам нашим мир, и велию милость.

Посреде святилища став, неописанный Бог же и Господь: Бог бо быше естеством, аще и нас ради вочеловечився, описан явился телом, всем источаше животочные глаголы, всем глаголя: души очистите, и зной страстей охладите, да не како лишатся пития человецы: Божественную бо благодать дарую безсмертного и лучшаго и вышняго Царствия: сопричаститися Мне Создателю, и прославитися.

И миней, 3. Слава, и ныне: глас 8:

Преполовившуся празднику прежде страсти, и славнаго Воскресния Твоего Господи, был еси учя Блаже, во святилищи непокоривыя иудей, и фарисей, и книжники, и вопия к ним: жаждай да грядет ко Мне и пьет: веруй в Мя, воды жизни, Духа Божественнаго, реки потекут от чрева его. О неизреченныя премудрости Твоего хваления! Иже вся исполняяй Боже наш, слава Тебе.

На стиховне, стихиры Осмогласника, глас 4:

Животворящему Твоему Кресту, непрестанно кланяющеся Христе Боже, тридневное Воскресние Твое славим: тем бо обновил еси истлевшее человеческое естество Всесильне, и иже на небеса восход обновил еси нам, яко един Благ и Человеколюбец.

Стих: К Тебе́ возведо́х о́чи мои́:

Хотѣх слеза́ми омы́ти мои́х грехо́в Го́споди, рукописа́ние и проче́е живота́ моего́ покая́нием благоугоди́ти Тебе́: но врагъ льсти́тъ мя и бо́рет ду́шу мою́. Го́споди, прѣжде да́же до конца́ не поги́бну, спаси́ мя.

Стих: Помилуй нас Го́споди, помилуй нас:

Му́ченичен: Прославля́йся в па́мятехъ святы́хъ Твои́хъ Христе́ Бо́же, от ни́х умоле́н быва́я, низпосли́ намъ ве́лию ми́лость.

Сла́ва, и ны́не: гласъ б:

Пра́зднику преполови́вшуся, Твоего́ Христе́ Воскресе́ния, и Боже́ственнаго прише́ствия Свята́го Твоего́ Ду́ха, сше́дшеся чуде́с Твои́хъ воспева́ем та́инства: во́ньже низпосли́&##769; намъ ве́лию ми́лость.

Тропа́рь пра́здника: Преполови́вшуся пра́зднику: И отпу́ст.

Понедельник

В понедельник на Утрени,

на Бог Господь: тропарь праздника преполовения.

По 1-м стихословии, седален, глас 4:

Возрѣвше на гробный вход, и пламене ангельскаго не терпяще мираносицы, с трепетом дивляхуся глаголюще: еда украдеса отверзый разбойнику рай? еда ли воста, Иже и прежде страсти проповедавый востание? Войстинну воскресе Христос, сущым во аде подая живот и воскресение.

Стих: Господи, да не яростию Твоею обличиши мене.

Смиренную душу мою посети Господи, во гресех житие все иждившую, и якоже блудницу приими мя Спасе, и спаси мя.

Стих: Дивен Бог во святых Своих, Бог Израилев.

Мученичен: Днесь ангельская воинства, в память страстотерпцев приидоша, верных мысли просветити, и вселенную благодатию уяснити: теми Боже, умолен бывая, даруй нам велию милость.

Слава и ныне: Богородичен:

Стена непоборимая нам христианом еси Богородице Дево: к Тебе бо прибегающе невредами пребываем, и паки согрешающе имамы Тя молитвенницу. Тем благодаряще вопием Ти: радуйся Благодатная, Господь с Тобою.

По 2-м стихословии седален, глас 8. Подобен:

Премудрость Слово Отчее, Иже и давый апостолом глагол Божий, проповедати концем, еже на землю Его пришествие, от прелестников евреев неистовством досаждаемь бываше, беснуяйся и прелестник грозно унижаемь, Иже незлобиво к ним вопияше: не судите на Мя суд несудимаго беззаконнии. К Немю убо возопийм: Человеколюбче Христе Боже, прегрешений оставление низпосли, воспевающим верою безприкладную славу Твою. [Дважды.]

Воскресение Христово: Псалом 50. Канон праздника, со ирмосы на 8, и Миней на 4. Кондак, и светилен праздника.

На хвалитех поставим стихи 4, и поем стихире воскресну, глас 4:

Крест претерпевый и смерть, и воскресый из мертвых Всесильне Господи, славим Твое Воскресение.

Овча есмь словеснаго Твоего стада, и к Тебе прибегаю Пастырю доброму, взыщи мене заблудшаго Боже, и помилуй мя.

Мученичен:

Кто́ не ужа́сается зря́ святыи́ мученицы, по́двиг до́брый, и́мже подви́заете́ся? Ка́ко в теле́ су́ще безплотна́го врага́ победи́сте, Христа́ испове́давшие, и кресто́м воору́живше́ся. Те́мже досто́йно яви́тесе́ бесо́м прогони́телие, и ва́рваром победи́телие: непреста́нно моли́тесе́, спасти́ся душа́м на́шим.

Сла́ва, и ны́не: глас 8:

Преполови́вшуся пра́зднику Па́схи, в хра́м вше́л еси́ святы́лищный, Спа́се на́ш, и ста́в посреде́ наро́да учи́л еси́ тех с дерзнове́нием, и глаго́лал еси́: А́з есмь́ све́т мира́, в сле́д Мене́ иды́й, не има́ть ходи́ти во тме́, но имети́ бу́дет све́т безсме́ртных жи́зни.

На стихо́вне стихи́ры, глас 2:

Подобен: До́ме Евфра́фов:

Пре́клонь небеса́, сше́л еси́ Спа́се мо́й, и пло́ть от Де́вы кроме́ прело́жения прия́л еси́, источа́я мне́ оставле́ние.

Сти́х: Бо́г же Ца́рь на́ш пре́жде ве́ка:

Ве́сь в Бо́зе Сло́ве Ты́ еси́, погиба́ющая мя́ хотя́ изы́ти от прегреше́ний, соединя́еши́ся мне́, Человеколю́бче.

Сти́х: Помяни́ сонм Тво́й, е́гоже стяжа́л еси́ испе́рва:

Ты́ прише́л еси́ Ца́рю, премудро́сте вели́кая, И́мже Оте́ц ми́р сотвори́ премудро́, со Святы́м Ду́хом.

Сла́ва, и ны́не: глас 8:

Очи́стим помышле́ний сокрови́ща, и душе́вная сия́ния просвети́м, и Жи́знь у́зрим Христа́, во святы́лице прише́дша, премно́жеством бла́гости, да врага́ победит, и спасе́т ро́д на́ш, страсти́ю Креста́ и Воскресе́ния. К Нему́ же возопи́им: непости́жиме Го́споди, сла́ва Тебе́.

В понедельник вечера,

на Господи возвах: стихиры подобны, глас 1.

Подобен: Небесных чинов:

Творец всех и жизни Податель, Отцу Божественному соприсносущное Слово, волею от Девы плоть прием, и быв Человек, неизреченная премудрости, яко Благ, всем источи учения.

Празднику преполовившуся иудейскому Христе, во святылищи предстал еси, закону Владыка учя властью, и книжники обличая, якоже писано есть, и ужасая премудростию словес Твоих, и чудес показаньи.

Податель премудрости, и добрых излиятель, изливаяй Божественная струи, от источника приснотекущаго: приидите ко Мне, зовёт, воду жизни жаждущии почерпите, и реки из чрева вашего, глаголет, дарований Божественных потекут.

Слава и ныне: глас 2:

Егда пришёл еси во святылище Христе Боже, преполовившуся празднику, тогда люди учил еси, вопия: веруяй в Мя, аще и умрет, жив будет. Иудеи же распыхахуся с фарисеи и саддукеи и книжники, глаголюще: кто есть Сей, Иже глаголет хулы? не помышляюще, яко Ты еси прежде всех век, со Отцем и Духом славимый Боже наш, слава Тебе.

На стиховне стихиры Осмогласника, глас 4:

Древа преслушания запрещение разрешил еси Спасе, на Древе крестнем волею пригвоздився, и во ад сошед Сильне, смертныя узы яко Бог растерзал еси. Темже кланяемся еже из мертвых Твоему Воскреснию, радостию вопиюще: всеильне Господи, слава Тебе.

Стих: К Тебе возведох очи мой:

Кто обуреваемый, и притекаяй ко пристанищу сему, не спасается? Или кто болезнуяй, и припадай к врачбнице сей, не исцелевается? Содетелю всех, и врачу недугоующих Господи, прежде даже до конца не погибну, спаси мя.

Стих: Помилуй нас Господи, помилуй нас:

Святых мученик приемый терпение, и от нас прими пение Человеколюбче, даруяй нам тех молитвами велию милость.

Слава, и ныне: глас 3. Германа:

Преполовившуся празднику, славим посреде земли спасение Соделавша: Посреде бо двою разбойнику Живот на Древе повешен бе, и хулящему убо умолчал, верующему же возопил: днесь со Мною будеши в

рай. Сшёл еси во гроб, пленил еси ад, и воскресл еси триднёвно, спасая души наша.

Вторник

Во вторник на Утрени.

По 1-м стихословии седален, глас 4.

Подобен: удивися Иосиф:

Вольною Твоею волею Крест претерпел еси Спасе, и во гробе нове положиша Тя человецы смертнии, словом концы составльшаго. Темже связан бысть чуждй: смерть люто пленяшеса, и сущии во аде вси взываху живоносному востанию Твоему: Христос воскресе Жизнодавец, пребываяй во веки.

Стих: Господи, да не яростию Твоею обличиши мене:

Помышляй душе, како предстанем Судий? поставятся престолы страшнии, и коегождо деяния обличатся. Тогда Судия неумолимый: тамо огонь люто предстанет, якоже свирепое море содержа, и покрываяй концы. Со всеми сими виждь душе моя, стени прежде конца.

Стих: Дивен Бог во святых Своих Бог Израилев.

Мученичен: Иже во всем мире мученик Твоих, яко багрянницею и виссом кровью Церковь Твоя украсившися, теми вопиет Ти, Христе Боже: людем Твоим щедроты Твоя низпосли, мир жительству Твоему даруй, и душам нашим велию милость.

Слава, и ныне: Богородичен:

Страшное таинство, и чудо преславное, како Дева Тебе Зиждителя всех понесе, и по рождестве паки целая и Дева пребысть? Рождейся из Нея веру утверди, языки укроти. И мир умири, яко Человеколюбец.

По 2-м стихословии, седальны, глас 8.

Подобен: Премудрости слова:

Премудрости воду и жизни источая миру, всех Спасе призываеши почерпсти спасения воды: Божественный бо закон Твой прием человек, в себе угашает, прелестное углие: отонудуже во веки не вжаждет, ни престанет насыщения Твоего Владыко Царю Пренебесный. Сего ради славим державу Твою Христе Боже, прегрешений оставление просяще послати богато рабом твоим. [Дважды.]

Воскресение Христово: Псалом 50. Канон праздника со ирмосы на 8, и минеи на 4. Кондак, и икос, и ексапостиларии праздника.

На хвалитех поставим стихи 4. И поем стихиры Осмогласника. Глас 4:

Крестом Твоим Христе, от древняя клятвы свободил еси нас, и смертью Твоею естество наше мучащаго диавола упразднил еси: востанием же Твоим радости вся исполнил еси. Темже вопием Ти:

воскресѣи из мѣртвых Господи, слава Тебѣ. [Дважды.]

Омый мя слезами моими Спасе, яко оскверних во многих гресех. Темже и припадаю Ти Милостиве: согреших, помилуй мя Боже.

Мученичен:

Ангелом сопричастницы бысте святїи мученицы, в подвиже Христа мужески проповедавшие: вся бо яже в мире остависте красная, яко не сущая, веру же яко агкиру твердую удержасте. Темже и лѣсть отгнавшие, источаете верным исцелений дарования, непрестанно молящися спастися душам нашим.

Слава, и ныне: глас 4:

Господи, прежде честнаго Твоего Креста, празднику преполовившуся, во святѣлице вшел еси, иудеи со дерзновением учя, Моисеом и в законе Тобою законоположенным, ужасающися же Христе, Твоя премудрости неизреченному таинству, еже на Тя роптанию в себе завистию поучахуся: како Сей вѣсть писмена не учився? Не ведуще Тебе Спаса душ наших.

На стиховне стихиры подобны, глас 2.

Подобен: Доме Евфрафов:

Конец сый и начало, преполовение же, посреде праздника предстал еси во святѣлицѣ Христе мой, источая ми оставление.

Стих: Помяни сонм Твой, егже стяжал еси исперва.

Слыша Сион Воскресния Твоего Божественную державу Слове, и радуется с чады, воспевая Тя Благоутробнаго.

Стих: Бог же Царь наш прежде века:

Свет от Отца, возсияв Слово, но напоследѣ лет явился еси яко Человек, подая мне прегрешений оставление.

Слава, и ныне: глас 8:

Преполовившуся празднику Пасхи, в храм вшел еси святѣлицный Спасе наш, и став посреде народа, учил еси тех с дерзновением, и глагола еси: Аз есмь свет мира, в след Мене идый, не имать ходити во тме, но имети будет свет безсмертныя жизни.

Во вторник вечера,

поставим стихов, 6. И поем стихиры преполовению 3, повторяюще я. Глас 4.

Подобен: Господи, возшед на Крест:

Наста преполовение дней, от спасительнаго начинаемых востания, Пятдесятницею же Божественною печатлеемое: и светится светлости обоюду имущее, и соединяющее обоя, и приити славе предъявляющее Владычняго Вознесения предпочитает.

Слыша и возвеселися Сион, благовестившуся Христову Воскресению: вернии же его сынове возрадовашася Сего видевше, и омывающа Духом скверну христоубийства: готовится торжествующи, обоих веселое преполовение.

Приблизися Божественнаго изъобильное излитие на всех, якоже написася Духа: предъзаконение проповедует, преполовившееся, по Христове смерти и погребении и Воскресении, от Него данну сущу учеником неложному обещанию, Утешителево показующу явление.

Слава, и ныне: глас 6:

Празднику преполовляющуся Твоего Христе Воскресния, и Божественнаго пришествия Святаго Твоего Духа, сшедшеся чудес Твоих воспеваем таинства: вонже низпосли нам велию милость.

На стиховне самогласны, глас 1:

Пятдесятницы наста дней преполовение, в немже Христос обнажив маловидно Божественную силу, разслабленнаго стягну словом, того от одра возставив, и боголепно чудотворя во зданном теле, человеком дарова вечный живот, и велию милость.

Стих: Помяни сонм Твой, егоже стяжал еси исперва.

Во святилище пришел еси Премудросте Божия, преполовляющуся празднику, учя и обличая непокоривыя иудеи, фарисеи и книжники, и вопия со дерзновением к ним: жаждай да грядет ко Мне, и пиет воду животную, и не вжаждет во век: веруйя Моей благодати, реки потекут из чрева его жизни вечныя. О благодати и благоутробия Твоего, Христе Боже наш, слава Тебе!

Стих: Бог же Царь наш прежде века:

Глас 2:

Егда преполовение праздника наста, взыде Иисус во святилище, и учаше непокоривыя иудеи, глаголя: жаждай да грядет ко Мне, и пиет воду

животную вечную, и не вжаждется в век. Веруяй в Мя, реки потекут из чрева его, и имети будет свет животный.

Слава и ныне: глас 8.

Преполовившуся празднику, учащу Ти Спасе, глаголаху иудее: како Сей весть писмена не учився? Не разумеюще, яко Ты еси Премудрость устроившая мир, слава Тебе.

Таже, тропарь отпустительный: Преполовившуся празднику: Тойже и на Бог Господь: в среду на Утрени.

Среда

В Утрени,

по 1-м, и по 2-м стихословии, седальны праздника: Воскресение Христо́во: Псалом 50. И каноны 4-го гласа, со ирмосом на 8: и осмаго гласа, на 6. Кондак, и йкос, и ексапостиларий праздника.

На хвалитех, Всякое дыхание: поставим стихи 4:

Премудрость и сила, Отчее сияние, Слово присносущное и Сын Божий, во святилище прииде плотию, и учаще иудейския люди жестокия и неблагодарныя, и удивляхуся премудрости богатству, вопиюще: откуда весть писмена ни от когоже учився? [Дважды.]

Книжником затыкаше уста, иудеи обличаше Мессиа Господь, вопия к ним: не на лице законопреступницы, яко неправедни судите: в субботу бо аз расслабленнаго воздвигнух. Темже Господь субботы есмь и закона: что ищите Мене убити, умершья воздвигшаго?

Навуфиа камением побилша лютии и законопреступнии, иудейское собрание неблагодарное, Исаию же пилою деревянною растроша, в кал мудраго Иеремию ввергоша, Господа же на Крест вознесше, взываху: храм разоряя, спаси Себе, и уверуем.

Слава, и ныне: глас 4:

Просветившися братие Воскресением Спаса Христа, и достигше преполовения праздника Владычня, приискренно сохраним заповеди Божия, да достойни будем и Вознесение праздновати, и пришествие получитьи Святаго Духа.

Славословие великое. И отпуст.

На Литургии блаженна обоих канонов, песнь 9-я. Прокимен, и Аллилуиа праздника, Апостол, и Евангелие дне. Причастный: Ядый мою плоть, и пий мойю кровь, во мне пребывает: И отдается праздник. Служба Минеи поется на Повечерии.

В среду вечера,

на Господи возвах: поставим стихов 6, и поем стихиры о самаряныне. Глас 4.

Подобен: Званный свыше:

На кладязе Христос самаряныню обрет, проси воду пити от нея, жаждай сея исправления и спасения, еже и уразумеса делы исполняемое. Сию бо влекущую питие, пития Сам извлекает, и пития исполняет живущаго, согражданом возвещающую: се древле в законе реченный Мессиа Христос, явися яко Человек, мыслей сокровенных открывая неизреченная.

Се Мессиа Христос, сущым во граде, на земли явися, самаряныня глаголет: написанный приити, иже содеянная мною сказа, и яже во глубине сердца моего сокровенная, вся мне рече, яко соверших. Темже град стекшийся видит словеса ея, по всему истинствующая, и вещи удивляется, и уверяется видению.

Тебе в шестый час, яко владыку иногда в рай ходяща бога, праматерняя виде дщи паки, в час шестый тако сядяща, идеже источник воды, и кладенец ископаса, и от нея просяща пити, яко да водою сию напоиши жизни нетления, еже и содеяся: твоя бо живоносная воды, она изобильно напившиися, и во граде проповеда водное богатство.

И Миней, 3. Слава, и ныне: глас 1:

На источник пришел еси, источниче чудес, в шестый час, Евин уловити плод: Ева бо в той изыде из рая прелестию змиевою: Приблужи бо ся самаряныня почерпсти воду, юже виде рече Спас: даждь Ми воду пити, и аз воды текущая насыщу тя, и во град текши целомудренная, народом возвести абие: приидите, видите Христа Господа, Спаса душ наших.

На стиховне стихиры Осмогласника, глас 4:

Врата адова сокрушил еси Господи, и Твоею смертию смертное царство разрушил еси: род же человеческий от тления свободил еси, живот и нетление миру даровав, и велию милость.

Стих: К Тебе возведох очи мой:

Апостольский лик, Духом Святым просветил еси Христе, и нашу скверну греховную теми отмый Боже, и помилуй нас.

Стих: Помилуй нас Господи, помилуй нас:

Мученичен: Имуже дерзновение ко Спасу святии, молитесь непрестанно за ны грешныя, оставление прегрешений просяще, и душам

нашым велию милость.

Слава, и ныне: глас 2:

На студенец яко прииде Господь, самаряныня моляше Благоутробнаго:
подаждь ми воду веры, и прииму купельныя воды радование и избавление:
Животодавче Господи, слава Тебе.

Тропарь: Светлую Воскресения:

Четверг

В четверток на Утрени,

по 1-м стихословии, седален, глас 4.

Подобен: Вознесыйся на Крест:

Распныйся нас ради волею, и вменен быв в мертвых Животодавче, и воскрес тридневно Христе Боже наш, сокрушил еси силою Твоею смерти державу, всех востанием Твоим сущих во аде ожививый. И воспевающе чтем Твое востание вси, безсмертне Господи.

Стих: Во всю землю изыде вещание их:

Подобен: Скоро предвари:

Светила в концех ученики Твоя, Спасе, показал еси сияюща Твоим проповеданием, просвещающыя души наша: прелесть идольскую теми омрачив, учеными благочестия просветивый мир. Тех молитвами спаси души наша.

Стих: Дивен Бог во святых Своих:

Мученичен: Крестом вооружившися страстотерпцы Твоя, победиша козни злоначальнаго врага, Христе Боже наш: возсияша яко светила, человеки наставляюще, подают исцеления верою просящим. Тех молитвами спаси души наша.

Слава, и ныне: Крестобогородичен:

Дева Пренепорочная, Преплагаго Бога рождающая, со апостолы Того непрестанно моли, оставление прегрешений, и исправление жития подати нам, прежде конца, верою и любовию воспевающим Тя по долгу, едина Всепетая.

По 2-м стихословии седален, глас 6.

Подобен: Упование миру:

Яко верней самаряныне Господи, Божества Твоего источник отверзл еси, и излил еси богоразумие на ню, напоая питием богоприятным: и ныне всем нам низпосли прегрешений очищение преблагий. [Дважды.]

Воскресение Христово видевшие: псалом 50. Канон самаряныни, со ирмосы на 8: и Миней на 4. Кондак, и икос самаряныни, и експостиларий, дважды.

На хвалитех поставим стихи 4. И поем стихиры Осмогласника, глас 4:

Отческих Твоих недр не разлучився, Единородне Слове Божий, пришел еси на землю за Человеколюбие, человек быв непреложен, и Крест и смерть претерпел еси плотию, безстрастный Божеством, воскрес же из мертвых, безсмертие подал еси человеческому роду яко един Всесилен.

[Дважды.]

Некнижнѣя ученики Духъ Твой Святый наказатели яви Христѣ Божѣ, и многовещаннымъ сличіемъ языковъ прелестъ упраздни, яко Всесиленъ.

Мучениченъ:

Како вашимъ подвигомъ не удивимся святѣи мученицы, яко теломъ мѣртвеннымъ обложени, безплотныя враги победисте? Не устрашиша васъ мучительская прещенія, ни ужасиша васъ мукъ приложенія, воистинну достойно отъ Христа прославитесь. Непрестанно молитесь спастися душамъ нашимъ.

Слава, и ныне: гласъ 2:

Собезначальный и соприносущный Сынъ и Слово о Отчѣе, на источникъ прииде, источникъ исцеленій, и жена отъ Самаріи прииде почерпсти воду, юже виде въ речѣ Спасъ: даждь Ми воды пити, и шедши пригласи твоего мужа. Она же яко Человеку глаголющи, а не Богу, утаити тѣщащися, глаголаше: не имамъ мужа. И Учитель къ ней: истину рекла еси: не имамъ мужа, пять бо имела еси, и ныне егѣже имаша, несть твой мужъ. Она же о глаголе удивившися, и во градъ текши, народомъ вопіяше, глаголющи: приидите видите Христа, Иже даруетъ миру велию милость.

На стиховнѣ самаряныни, Гласъ 4. Подобенъ: Яко добля:

Ты источникъ благодати съи и пучина, жизни же хранитель, едине Благоутробне, како женѣ самаряныне бесѣдуя возгласилъ еси: даждь Ми воду пити, яко да приимеши оставленіе: воспѣваемъ Твое многое благоутробіе, имже спасаеши человѣческій весь родъ, за многую благодать.

Стихъ: Наляцы, и успевай, и царствуй, истины ради, и кротости, и правды.

Приидите видите Человека, Иже речѣ ми днесь на источницѣ седяи, что сотворихъ: Пророкъ бо истиннеший естъ и превеликий, сокровенная и явленная ведый вся. Но даруй воду живу, юже подаеши жаждущимъ, да не вжажду паки во веки, Человеколюбче.

Стихъ: Возлюбилъ еси правду, и возненавидѣлъ еси беззаконіе.

Источникъ приснотекущий, животѣ безсмертне, струя неистоощаемая же и нетленная, путешествовавъ седяше близъ кладязя, Своя ученики пославъ по брашно, бесѣдоваше женѣ черплющей, сию хотя уловити, и просветити души ея очи.

Слава, и ныне: гласъ 3:

Да радуется днесь свѣтло небо и земля, яко Христосъ явился воплощаемъ яко Человекъ, да Адама изметъ отъ клятвы всеродна, и удивляется чудесы въ Самарію пришедъ: женѣ же бесѣдоваше воды прося, Иже облаки водами одевай. Темже вси вернии поклонимся, насъ ради волю Обнищавшему,

благотро́бным сове́том.

В четверток вечера,

на Господи возвах: стихиры подобны, глас 4.

Подобен: Господи, возшед на Крест:

Видите, Егоже преднаписа Моисей, Иисуса Мессию, в законе приити, на земли явльшася благоутробия ради и мне беседовавша яко Человека на кладязе: воистинну Сей есть Христос в мир грядый, сущым в Сихаре самаряныня явися глаголющи.

От сладких уст жены, воду пиемую, сладкую истекающую, сущии во граде пьюще, и ко кладязю источающему обилие воды, потсахуся тещи скоро и источник видети приснотекущий, истаявшыя души воспрохлаждающий.

Сообразный видяще источник, и единовидный человеческого составления, жену вопияху во граде сущии: не ктому твоея ради беседы мы вероухом, воистинну познавше, яко Той есть избавление и спасение миру вечное.

Слава, и ныне: глас 6:

При студенце Иаковли обрет Иисус самаряныню, просит воды от нея, облаками покрываяй землю. О чудесе! Иже херувимы носимый, блуднице жену беседоваше, воды прося, Иже на водах землю повесивый: воды иский, иже источники и езера вод изливаяй: хотя привлещи сию воистинну, уловляемую от супостата врага, и напоити ю водою живою, палимую в безместных лютых, яко един Благоутробный и Человеколюбец.

На стиховне стихира крестная, глас 4:

Всегда имуща Христе, Крест Твой на помощь, сети вражия удобь побираем.

Стих: К Тебе возведох очи мой:

Воскресна: Господи, возшед на Крест, прадедную нашу клятву потребил еси: и сошед во ад, яже от века узники свободил еси, нетление даруя человеческому роду. Сего ради поюще славим животворящее и спасительное Твое востание.

Стих: Помилуй нас Господи, помилуй нас:

Мученичен: Жертвы одушевленные, всежжения словесная, мученицы Господни, закления совершенна Божия, Бога знающая, и Богом знаемая овчата, ихже ограда волком невходна, молитесь и нам упасеным быти с вами на воде упокоения.

Слава, и ныне: глас 6:

Тако глаголет господь самаряныни: аще бы еси ведала дар Божий, и кто есть глаголяй тебе, даждь Ми воды пити, ты бы просила у Него, и дал бы ти пити, да не вжаждешия во веки, глаголет Господь.

Пятница

В пяток на Утрени,

по 1-м стихословии седален, Осмогласника, глас 4.

Подобен: Скоро предвари:

На Кресте Тя пригвоздиша иудеи Спасе, имже от языков нас воззвал еси Христе Боже наш, простерл еси длани на нем волею, копием же в ребра Твоя изволил еси пробостися: множеству щедрот Твоих слава Человеколюбче.

Стих: Дивен Бог во святых Своих, Бог Израилев.

Мученичен: Мученицы Твоя Господи, во страданиях своих венцы прияша нетленные от тебе бога нашего. Имуща бо крепость Твою, мучителей низложиша, сокрушиша и демонов немощныя дерзости. Тех молитвами спаси души наша.

Слава, и ныне: Крестобогородичен:

На Кресте Тя возвышаема яко узре Пречистая Мати Твоя, Слово Божий, матерски рыдаючи вещаше: что новое и странное сие чудо сыне мой? Како животу всех вкушаеши смерть, оживити умершья хотя, яко Благоутробен.

По 2-м стихословии седален праздника, глас 4:

Подобен: Скоро предвари:

От кладязя воды, земнаго и тленнаго, пришедши обычно самаряныня почерпсти, живую воду почерпе: тако обретши источник седящий, идеже источник и кладязь Иаков ископа, мира пламенопитательныя зноем напаяющий. [Дважды.]

Воскресние Христово: псалом 50. Канон самаряныни, со ирмосом на 8: И Минеи на 4.

На хвалитех стихиры Осмогласника, глас 4:

Дал еси знамение боящимся Тебе Господи, Крест Твой честный, имже победил еси начала тмы и власти, и возвел еси нас на древнее блаженство. Темже Твое человеколюбное смотрение славим, Иисусе Всесильне, Спасе душ наших. [Дважды.]

Крестом Твоим Христе Спасе, настави нас на истину Твою, и избави ны от сетей вражиих: воскресый из мертвых, возстави ны падшья грехом, простер руку Твою Человеколюбче Господи, молитвами святых Твоих.

Мученичен:

Честна смерть святых Твоих Господи: мечами бо и огнем, и студению сокрушаеми, излиша кровь свою, надежду имуща на Тя, воспряти трудов

мзду: претерпéша, и прия́ша от Тебé Спа́се вéлию мѝлость.

Слава, и ны́не: глас 6:

Исто́чник живонача́лия Иису́с Спа́с на́ш, ко исто́чнику прише́д патриарха́ Иа́кова, пи́ти проша́ше воды́ от жены́ самаряны́ни. Се́й же неприобщѝтельное иудее́м прире́кшей, му́дрый Зиждитель́ приво́дит ю́ сладкими́ глаго́лы, паче́ к проше́нию присноживо́тныя воды́, ю́же и прии́мши все́м пропове́да, ре́кши: прии́дите ви́дите та́йных ве́дца и Бо́га, прише́дша плоти́ю, за е́же спасти́ челове́ка.

На стихо́вне стихи́ры, глас 4.

Подобен: Я́ко до́бля:

С почерпа́лом почерпсти́, прише́дши ко кла́дязю, почерпа́ло без воды́ оста́вивши, е́дина ко гра́ду востече́, исто́чник животеку́щий вопи́юще обрести́ самаряны́ня, незавѝстный. Отону́дуже почерпе́ спасительную́ воду, и се́ю прохла́ди се́рдце истая́вшее страстьми́.

Сти́х: Наля́цы, и успева́й, и ца́рствуй, исти́ны ра́ди, и кро́тости, и правды́.

Вои́стинну рекла́ еси́, рече́ Спа́с самаряны́не, я́ко не има́ши днесь́ мужа́ законна́, пять́ бо имела́ еси́ пер́вее, и ны́не, его́же стяжала́ еси́, несть́ тво́й му́ж, но зако́на чу́ждь. Я́же и потща́вшись су́щым во гра́де вопия́ше: ви́дех Челове́ка, И́же изрече́ ми вся́, елика́ вта́йне сотвори́х.

Сти́х: Возлюби́л еси́ правду́, и возненави́дел еси́ беззакони́е.

Стру́ю ину́ю животеку́щую, от небесна́го кла́дязя́ самаряны́ня почерпе́, на кла́дязе обрѝтши́ сию́ излива́ему, из него́же тле́нную имя́ше по обы́чаю почерпсти́ воду, ину́ю земну́ю. Но иная́ входя́щая в се́рдце ея́ показáся, а́ки исто́чник ины́й но́вый, страсте́й ороша́ющий распале́ние.

Слава, и ны́не: глас 8:

Егда́ яви́лся еси́ во плоти́ Христе́ Бо́же, за неизрече́нное смотре́ние, слы́шавши самаряны́ня сло́во Тебé́ Человеколю́бца, оста́ви почерпа́ло у́ студенца́, и тече́ глаго́лющи́ су́щым во гра́де: прии́дите, ви́дите Сердцеве́дца, еда́ Се́й е́сть чае́мый Христо́с, имей́ велию́ мѝлость?

В пятѡк вѣчера,

на Господи возвах: поставим стихѡв 6, и поѣм стихирѡ самарянѣни три, и Минѣи три.

Стихирѡ самарянѣни, глас 1:

На истѡчник пришѣл еси, истѡчнике чудес, в шестѡй час, Евин уловити плѡд: Ева бо в той изыде из рая прелестию змиевою. Приблѣжи бо ся самарянѣня почерпсти воду, юже виде в речѣ Спас: даждь Ми воду пити, и аз воды текущия насыщу тя. И во град текши целомудренная, народом возвести абие: приидите видите Христа Господа, Спасителя душ наших.

Глас 2: На студенец яко прииде Господь, самарянѣня моляше Благоутробнаго: подаждь ми воду веры, и прииму купельныя воды, радование и избавление, Животодавче Господи слава Тебе.

Собезначальный и соприносущный Сын и Слово Отчее на истѡчник прииде, истѡчник исцелений, и жена от Самарии прииде почерпсти воду, юже виде в речѣ Спас: даждь Ми воду пити, и шедши пригласи твоего мужа. Она же яко Человеку глаголющи, а не Богу, утайти тѣщащися, глаголаше: не имам мужа. И Учитель к ней: истину рекла еси, не имам мужа: пять бо имела еси, и ныне егоже имаша, несть твой муж. Она же о глаголе удивившися, и во град текше, народом вопиаше, глаголющи: приидите, видите Христа, Иже дарует миру велию милость.

Слава: глас 6:

При студенце Иаковли обрет Исус самарянѣню, просит воды от нея, облаками покрываяй землю. О чудесе! Иже херувимы носимый, блуднице женѣ бесѣдоваше, воды прося, Иже на водах землю повесивый, воды иский, иже истѡчники и езера вод изливаяй, хотя привлеци сию воистинну, уловляемую от сопостата врага, и напоити ю водою живою, палимую в безместных люте, яко един Благоутробный и Человеколюбец.

И ныне: Богородичен, глас 4:

Иже Тебе ради, богоотец пророк Давид, песенно о Тебе провозгласи, величия Тебе сотворшему: предста Царица одесную Тебе. Тя бо Матерь ходатаицу живота показа, без Отца из тебе вочеловечитися благоволивый Бог да Свой паки обновит образ, истлевший страстьми, и заблудшее горохищное обрет овча, на рамо восприим, ко Отцу принесет, и Своему хотению, с небесными совокупит силами, и спасет Богородице мир, Христос имеяй велию и богатую милость.

На стиховне стихирѡ воскресны Осмогласника, глас 4:

Животворящему Твоему Кресту, непрестанно кланяющемся Христе Боже, тридневное Воскресение вою славим: тем бо обновил еси истлевшее человеческое естество Всесильне, и иже на небеса восход обновил еси нам, яко един Благ и Человеколюбец.

Стих: Господь воцарися, в лепоту облечеса.

Древа преслушания запрещение разрешил еси Спасе, на Древе крестнем волею пригвоздився, и во ад сошед Сильне, смертныя узы яко Бог растерзал еси. Темже кланяемся еже из мертвых Твоему Воскресению, радостно вопиюще: всеильне Господи, слава Тебе.

Стих: Ибо утверди вселенную:

Врата ада сокрушил еси Господи, и Твоею смертию смертное царство разрушил еси, род же человеческий от тления свободил еси, живот и нетление миру даровав, и велию милость.

Стих: Дому Твоему подобает святыня:

Господи возшед на Крест, прадедную нашу клятву потребил еси, и сошед во ад, яже от века узники свободил еси, нетление даруя человеческому роду. сего ради поюще славим, животворящее и спасительное Твое востание.

Слава, и ныне: глас 8:

Егда явился еси во плоти Христе Боже, за неизреченное смотрение, слышавши самарянина слово Тебе Человеколюбца, остави почерпало у студнца, и течет глаголющи сущым во граде: приидите, видите Сердцеведца, еда Сей есть чаемый Христос, имеяй велию милость?

Суббота

В субботу на Утрени,

по 1-м стихословии седален воскресен, глас 4:

Возрѣвше на гробный вход, и пламене ангельскаго не терпяще миросицы, с трепетом дивляхуся глаголюще: еда украдеса, отверзый разбойнику рай? еда ли воста, Иже и прежде страсти проповедавый востание воистинну воскресе Христос, сущым во аде подая живот и воскресение. [Дважды.]

Слава, и ныне: Богородичен:

Еже от века утаеное, и ангелом несведомое таинство, Тобою Богородице сущым на земли явися Бог, в неслитном соединении воплощаемь, и Крест волею нас ради восприим, имже воскресив первозданнаго спасе от смерти души наша.

По 2-м стихословии седален, глас 4.

Подобен: Вознесыйся на Крест:

Да радуется небо, да веселятся земная, яко Христос от Девы явися яко Человек, избави из исления все человечество Своею смертию, чудесы возсия: жену самаряныне воды просящей, подаёт источник исцелений, яко един Безсмертный. [Дважды.]

Воскресение Христово: псалом 50: Канон праздника, на 6: И святого обители, на 4: И Миней на 4. Кондак, и ексапостиларий праздника.

На хвалитех поставим стихи 4. И поем настоящыя стихиры воскресны, глас 4:

Крест претерпёвый и смерть, и воскресый из мёртвых, Всесильне Господи, славим Твое Воскресение.

Крестом Твоим Христе, древняя клятвы свободил еси нас, и смертию Твоею естество наше мучащаго диавола упразднил еси, востанием же Твоим радости вся исполнил еси. Темже вопием Ти: воскресый из мёртвых Господи, слава Тебе.

Твоим Крестом Христе Спасе, настави нас на истину Твою, и избави ны от сетей вражиих: воскресый из мёртвых, возстави ны падшыя грехом, простер руку Твою Человеколюбче Господи, молитвами святых Твоих.

Отеческих Твоих недр не разлучився Единородный Слово Божий, пришёл еси на землю за человеколюбие, Человек быв непреложен, и Крест и смерть претерпел еси плотию, безстрастный Божеством: воскрес же из мёртвых, безсмертие подал еси человеческому роду, яко един Всесилен.

Слава, и ныне, глас 6:

Источник живоначала Иисус Спас наш, ко источнику пришед патриарха Иакова, пити просаше воды, от жены самаряныни: сей же неприобщительное иудеом прирекшей, мудрый Зиждитель приводит ю сладкими глаголы, паче к прошению присносущныя воды, юже и приемши всем проповеда рекущи: приидите, видите сокровенных ведца и Бога, пришедшаго плотию, за еже спасти человека.

На стиховне стихиры, глас 4.

Подобен: Яко добля:

Источника приснотекущаго сидяща на кладязи видевши жена, терпящи зной премногих страстей исцелительную просаше прияти воду жизни, из Него изливаемую аки поток: юже и прият туне от Слова и не ктому ко кладязю тщится, земному и тленному.

Стих: Наляцы, и успевай, и царствуй, истины ради и кротости, и правды.

Иудейския обычаи женé гонящей, и своё прилагающей непричастное, причастию воды Христос, приобщи мудрый Содетель, сладкими провещаньми, и просити животекущую сию воду Божественную, юже пивши, ко граду прииде возвещаючи бывшая.

Стих: Возлюбил еси правду, и возненавидел еси беззаконие.

Ни почерпала имаши, и кладязь глубочайший, откуда убо подаси ми воду нетленную? Самаряныня вопияше Ти Христе, Тебе яко человека мящи, а не Бога, и словесем чудящися: юже вещаньми сладчайшими напоив, и Бога Тя всех тварей исповедати сотворил еси.

Слава, и ныне, глас 6:

Такó глаголет Господь самаряныни: аще бы еси ведала дар Божий, и Кто есть глаголай тебе, даждь Ми воды пити: ты бы просила у Него, и дал бы ти пити, да не вжаждешися во веки, глаголет Господь.